



KOMUNIKADO

Fecha

27 di yüni 2015

Account Manager

Jhanirha Da Costa Gomez-Anita

Email

jhanirha.anita@gobiernu.cw

BUELO DI AVIANCA A BAHÁ NA KÒRSOU DESPUES DI TURBULENSHA SEVERO

Willemstad – Minister di Tráfiko, Transporte i Planifikashon Urbano, Sra. Camelia-Römer i Outoridat di Aviashon Sivil di Kòrsou (CCAA), ta informá ku un buelo di Avianca mester a desviá di su destinashon i aterisá na Kòrsou den ora nan trempa di awe marduga, debi na turbulensha severo kual a resultá den algun persona heridá.

Pa mas eksakto, 01:51 di awe marduga e buelo di Avianca AV018, ku a sali for di Bogota ku destinashon Barcelona, mester a desviá for di nan destinashon. Esaki debi na turbulensha severo durante di e buelo. E kapitan a optá pa hasi un aterisahe di emergensia i baha na Aeropuerto Internashonal di Kòrsou.

Ofisialnan di CCAA a keda informá pa Curaçao Airport Partners (CAP) su staf di operashon i a presentá na e sitio. Un investigashon preliminar a keda kondusí i a hasi un inspeksion di e avion tambe. E avion, un Airbus A330 Jetliner, na e momentu aki ta permanese riba suela na Aeropuerto Hato.

Informashonisial ta indika, di e 250 pasahero i 11 miembro di kabina a bordo, 6 persona mester a keda hospitalisá aki na Kòrsou ku varios herida. Sobra pasaheronan i miembronan di kabina a keda akomodá na varios hotel aki na Kòrsou, kual a keda alerta di e situashon dor di Minister di Desaroyo Ekonomiko.

Apesar ku e no tabata un kalamidat, a pidi asistensia di Direktorado di Maneho di Riesgo i Maneho di Kalamidat. Tantu servisionan di emergensia na Aeropuerto komo na Hospital a aktuá ku deligencia riba e suseso inesperá aki di awe marduga. Otro servisio manera Krus Kora, i Stichting Slachtofferhulp tambe a duna asistensia, inkluso e diferente konsuladonan. Tur esaki den estrecho kordinashon i deliberashon ku Minister President di Kòrsou, sr. Ivar Asjes.

Emergensiyanan médiko di e tipo aki no ta algu no-komun. Aeropuerto Hato, debí na su pista di aterisahe largu i posishon geográfiko, ta duna bentaha den nos region pa su abilidad pa akomodá avionnan grandi i pisa. E avion di Avianca a lanta buelo awe merdia pa Barcelona, Spaña.

Tur komunikashon ta keda kordina pa medio di un Tim for di ofisina di Minister di Trafiko, Transporte i Planifikashon Urbano, Sra. Camelia-Römer. Minister ta felisita entre otro CCAA, CAP, servisio di Ambulans, Brandweer, i tur otro ku a duna nan asistensia i a atende ku e situashon aki na un manera efisiente.